

AKASHVANI AIZAWL
REGIONAL NEWS BULLETIN
HEADLINES (EVENING)

Date – 30/04/2026

Time - 18:30 -18:40Hrs

- Hmar Peoples' Convention Democratic, Lalhmingthanga Sanate Faction te chuan an ralthuamte tungin nunphung pangai zawh turin an rawn kir.
- All India Radio kum 90 a tlin lawmna tur khuh hawna Lamp Lighting Ceremony chu vawiin khan Akashvani Aizawl station Tuikhuahtlang ah hman a ni.
- Union Railway Minister Ashwini Vaishnaw chuan vawiin khan Srinagar-Jammu Vande Bharat Express service thar chu Jammu Tawi Railway Station atangin a hawng.
- Sawrkar laipui chuan ramchhungah leitha mamawh khawp a awm a ti.



HPCD LAYING OF ARMS

Hmar People's Convention - Democratic (Lalhmingthanga Sanate's Faction) te chuan vawiin hian CTI, Sesawngah silai an tung a, silai tun inkhawm Laying of Arms Ceremony hi Chief Minister Pu Lalduhoma hovin neih a ni a, an inremna tih famkim nan ralthuam hi an hlan a ni.

Chief Minister Pu Lalduhoma chuan thusawiin remna leh muanna chu a hlu hle a, tunah chuan HPC Area a awm te pawh thlamuang takin an awm thei tawh dawn a ni a ti a, a hunlaia thuneitu te thutlukna a pawimawh tih sawiin, thutlukna dik lo chuan nghawng tha lo leh siam that harsa tak a thlen thei a, a turtu chu mipui an ni tih a sawi a, thutlukna dik erawh chuan kawng dikah mi a hruai thin a ti a ni.

Pu Lalduhoma chuan Mizorama thil thleng langsar tak tak tawhte sawiin Mizoram tana zalenna sualtu te khan an theihtawp an chhuah a, an nunna hlu tak an hlan avangin sawi nep a rem lo, a ti a. Rambuai lai leh tuna HPC (D) te boruak sawi langin, a tir lam kha kohkir leh theih ni ta se hetiang thutlukna hi an siam ang em tih inzawt turin mipui te a chah bawk a ni.

Silai tun inkhawmah hian HPCD (LS) President Pu Lalhmingthanga Sanate chuan thusawiin, Mizoram hmar leh hmar chhak lam chu ngaihsak an tul tih sorkar ah an tilang ve a, amaherawh chu an tihlan dan erawh mi zawng zawng hriatthiam zawng ani lem lo a, a lawmawm lemloh tih pawh an pha lo tih sawiin, kum 23 hnuah Mizoram sorkar a bik takin tuna Chief Minister hnar kaihna hnuaiyah inbiaiin, inremna thuthlung an siam a, he inremnaah hian an duh zawng zawng a kim vek lo a amaherawh chu kalphung thar Mizoram sorkar ah an lengin an hria a, an mipuite, anmahni thlawp tute leh duhsaktute avangin an lo chhuak a ni a ti.

Pu Lalhmingthanga chuan Sorkar lam an inhawng hle a an hriatthu sawiin, Manipur lama hnam buaina a chhuah pawhin, an unaute harsatna hre rengin hchawp leh chilhin Tuivai leil an dawh sak a, Mauchar khua leh Neepeco inkar kawng chhe em em loh theih loh a zawh tul si pawh emergency a siam dan kawng an dapsak a, chu chu an mipuiten an hrevek a chuvangin anni sorkar thar chu belh tlak an ni tiin luhchilh a thawk ho turin an ringgam a ni a ti.

Home Minister Pu K Sapdanga pawhin thusawiin Mizoram chanchin ziahna a pawimawh leh langsar tak a ni a ti a, anmahni chauh ni loin an nu leh pa, an fate

thlamuang taka an awm theihna tur a an lo haw chu lawmawm a tih thu a sawi a. Remna a lo awm theih chhan langsar tak chu remna duhtu ram hruaitu Chief Minister an neih vang a ni a ti a, Mizoram mipui ten remna a awm theih nana nasa taka hma lo la tawh a nih avangin ‘Symbol of Peace’ tia koh ngam a ni a ti.

Tunah chuan ralthuam hian leka an duh ti hlawhtlinna tur kawng an zawh chhan ti hlawhtling turin, anmahni chauh a thawk loin Mizoram sorkar nenkan thawkho thei dawn ta tihna a ni, a ti bawk.

Mizoram sorkar leh Hmar People’s Convention - Democratic (Lalhmingshanga Sanate’s Faction) te chuan tun thla ni 14 khan Sakawrdai Vengpui Community Hall-ah inremna thuthlung, Memorandum of Settlement an ziaak a; Mizoram chhunga ralthuam keng chi bil hel pawl la awm chhun nia hriat HPC-D (LF) te hi 2024 kum laihawl atangin a dawr tan a ni.

Kum 1986 a Peace Accord ziah a nih khan Hmar hnamten an beisei a phak lova ngaiin HPC an din ta a. Kum 1994 ah Mizoram sorkar nen an ziaak a, Sinlung Hills Development Council a ding ta a. He inremnaa dam thei lo mi thenkhatin HPC(D) a din leh a, chuta an hruaitu hmasa ber chu Lalhmingshanga Sanate hi a ni. HPC(D) Pu H. Lalsangbera Faction lam chu sorkarin kum 2018 April thlaah inremna a neihpui a. Vawiina inremna a neihpui leh tak Pu Lalhmingshanga Sanate Faction hi kum 2024 atang khan inbiakna neihpui lehin, tum li inbiakna neih a nih hnuah inremna ziaak a lo ni ta a. He ti hian Mizoramah hnam bil hel pawl an awm tawh lo nia hriat a ni.



AKASHVANI 90 YEARS LAMP LIGHTING

All India Radio in kumina kum 90 a tlin lawmna tur khuh hawna Lamp Lighting Cenremony chu vawiin khan All India Radio Aizawl station Tuikhuahlang ah hman a ni.

Vawiina hun hmanah hian All India Radio Aizawl Director leh Mizoram Cluster Head Pu DR Lalropuia chuan All India Radio bulṭan dan sawiin June ni 8, kum 1936 ah din ani a ti a, India in ram zalen anih hma in mipuite awi tleitu ber alo ni tawh a ti a, thuthar puanchhuahna ringawt nilovin India hmasawna tura thawktu sawrkar leh mipuite thlunzawmtu ṭangkai tak ani a ti a, tun thlengin mipuite rin ber ani tih sawiin India in Viksit Bharat 2047 hmalaka hnuaiia ram hmasawn nih a tumna ah pawh Radio chuan mawhphurhna pawimawh tak a nei tih a sawi a ni.

Director chuan kumin All India Radio in kum 90 a tlin lawm rualin All India Radio Aizawl chuan July ni 31 ah kum 60 a tling a ti a, All India Radio Aizawl chu mipuiin thu thar an hriat theih nan leh an him tlan zawk theih nan rambuui hunlaia din ani a ti a, Mipui thinslungah a hlutna a la ngai reng tih sawiin tunlai khawvel hmasawn zel rualin All India Radio in hma a sawn theih nan thawktute theihtawp chhuah turin a chah a ni.

Asst Director (News) Pu Gin Gangte pawhin thusawiin ṭangthar ah Radio hlutna a zual zel theih nan thawktute theihtawp chhuah a ṭul thu a sawi a, Radio chuan thuthar chhuah mai bakah khawtlang nun siamṭhat kawngah nasa takin a thawk tih a sawi.

Hemi hnu hian Director hian Akashvani in kum 90 a tlin lawmna pualin FM tower-a AIR 90 Years chhit det chu a hawng a, Asst Director (Prog) Pu Biakchungnunga pawhin thusawiin programme hlimawm tak hman a ni.

All India Radio Aizawl hian kum 90 tlin lawmna pual hian state chhungah lawmna hrang hrang a buatsaih dawn a, Walkathon bakah a lawmna pui ber June ni 8 ah Chief Minister Pu Lalduhoma hovin Vanapa Hall ah hman a ni dawn a ni.

<><><>

EMRS GIRLS SELF DEFENSE TRAINING

EMRS school hmeichhe naupang te tana mahni invenna tur taekwondo training vawiin khan hawn a ni a,

Hawna inkhawm hi Planning & Programme Implementation Department Conference Hall-ah neih a ni a, Women & Child Development Dept. Director Pi Zoramthangi Chhangte chuan he hun hi a hmanpui a ni.

Pi Zoramthangi chuan sorkar laipui scheme Beti Bachao Beti Padhao chuan hmeichhe naupang hmasawna turin Self Defense pek a ngaipawimawh hle a, taksa hriselna mai bakah rilru hriselna leh mahni inrintawkna a pe tel a, Hmeichhe naupang ten mahni inringtawk taka an inven theih chuan khawtlang a him mai ni lovin intluktlanna kawngah hmasawna a thlen theih a ni a ti a, BBBP thil tum hmeichhia te chawikanna lama tih tur tih kawngah Mizoram chuan hma nasa takin a sawn chho a ni a ti.

Self Defence Training for EMRS school Girls hi sorkar laipui Ministry of Tribal Affairs hnuiaia National Education Society for Tribal Students in a ngen angin, Beti Bachao Beti Badhao scheme atanga fund hmuh a ni a, Mizoram Amateur Taekwondo Association (MATA) ten trainer tur buatsaihin, Eklavya Model Residential School hrang hrang 11-Lunglei, Serchhip, Lawngtlai, Ngopa, Tuipang, Chawngte, Tlangnuam, Tlungvel, Zawlnuam, Bilkhawthlir leh Noaohtlah a hmeichhia pawl VI -XII atanga zirlai naupang 1819 te tan training hi buatsaih ani ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

VANDE BHARAT EXPRESS

Union Railway Minister Ashwini Vaishnaw chuan vawiin khan Srinagar-Jammu Vande Bharat Express service thar chu Jammu Tawi Railway Station atangin a hawng. He rel hi Srinagar atanga Shri Pata Vaishno Devi Katra thlenga tlan tur a ni. Thusawiin Pu Vaishnaw chuan railway sector ah kum 12 kalta chungin inthlak danglamna tam tak a thleng a ti a. Jammu and Kashmir-a Article 370 tihbo anih hnuah hmasawna tam tak a thleng a ni a ti bawk.

Vawiinah rel service hawna inkhawmah hian Union Minister of State Jitendra Singh leh J&K Chief Minister Omar Abdullah te an tel a ni.

<><><>

FERTILIZERS

Sawrkar laipui chuan ramchhungah leitha mamawh khawp a awm a ti. Vawiina Inter-Ministerial briefing ah Department of Fertilizers Additional Secretary Aparna Sharma chuan Kharif season 2026 chhungin leitha fertilizer mamawh zat aia tam semchhuah tur a awm a ti a. Ramchhunga leitha siamchhuah pawh 62.37LMT a tling a. Rampawn atangin 15.39 LMT lakluh a ni a. Tun dinhmunah 78 LMT vel a awm a ti bawh a ni.

<><><>